

**Nioqqutissanik eqqussuineq annissuinerlu pillugit Inatsisartut inatsisaata
allanngortinneqarneranik Inatsisartut inatsisaat**
(Nunatsinnut angalasunik nakkutilliineq kiisalu aningaasanut atoriaannarnut il.il.
killiliussamik appaaneq)

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneerreqarneranut

ISUMALIUTISSIISSUTAA

Aningaasaqarnermut Akileraartarnermullu Ataatsimiititaliap suliarinninnermini ilaasortarai:

Inatsisartunut ilaasortaq Erik Jensen, Siumut, siulittaasq
Inatsisartunut ilaasortaq Kuno Fencker, Naleraq, siulittaasup tullianut sinniisoq
Inatsisartunut ilaasortaq Mariane Paviassen, Inuit Ataqatigiit
Inatsisartunut ilaasortaq Margrethe Thaarup Andersen, Demokraatit
Inatsisartunut ilaasortaq Jørgen Rosbach, Demokraatit

UKA 2025-mi ulloq 25. september siullermeerinninnerup kingorna ataatsimiititaliap
siunnersuut misissorpaa.

Siunnersuutip imarisaa siunertaalu

Angalasunut malittarisassiorneq pillugu inatsimmi malittarisassanut atuuttunut atatillugu
nunatsinni angalasunut immikkut tunngavissat ilanngunneqarput. Nunanut allanut angalasut
nunatsinnilu angalasut ataatsimut tikittarfimmiittalernerisa aallariartortarfimmiittalernerisalu
malitsigisaanik unioqqutitsilluni nioqqutissanik akitsuuserneqanngitsunik eqqussuisoqarneru-
sinnaanera nunatsinni angalasunik nakkutilliinissamut tunngavissiinikkut pinaveersaartinne-
qassaaq. Tamatuma peqatigisaanik nunanut allanut angalasut nunatsinnilu angalasut ataatsimut
nakkutigineqartalissapput kiisalu unioqqutitsilluni eqqussuineramik akiuiniarneq nukittor-
saavigineqarluni.

Tamatuma saniatigut nunatsinnit nunatsinnullu angalanermi pigisanik nalilinnik nassiussi-
nermut nassarnermullu atatillugu killiliussap 50.000 kr.-nit 15.000 kr.-nut apparneqarnissaa

siunnersuutigineqarpoq. 15.000 kr.-t sinnerlugit aningaasanik tigoraaannarnik nassitsinissamik nassarnissamilluunniit kissaateqartoqarpat, tamanna akitsuuteqarfimmut tikinnermi tassanngaaniilluunniit aallarnermi Akileraartarnermut Aqutsisoqarfimmut nalunaarutigineqassaaq.

Siunnersuutip Inatsisartuni siullermeerneqarnera

Siunnersuut partiinit amerlanerussuteqartunit taparserneqarpoq. Kiisalu siunnersuutip kingunerisassaanut tunngasut aalajangersimasut kingunerisaannik siunnersuutip Aningaasaqarnermut Akileraartarnermullu Ataatsimiititaliamit suliarineqartussanngorlugu innersuunneqarnissaa pisariaqartinneqartoq siullermeerinninnermi oqaatigineqarmat ataatsimiititaliamit maluginiarneqarpoq.

Tusarniaanermut akissutit

Siunnersuut piffissami 18. juni 2025-mit 16. juli 2025-mut tamanut tusarniaassutigineqarimasooq siunnersuuteqartumit paasissutissiissutigineqarpoq. Ataatsimiititaliaq tamatumunnga annertunerusumik oqaaseqaatissaqanngilaq.

Ataatsimiititaliap siunnersuummik suliarinninnera

Siunnersuut siullermeerinninnermi tapersorsorluarneqartoq ataatsimiititaliami oqaatigineqassaaq. Siunnersuutip ilaa nunatsinnit nunatsinnullu angalanermi pigisanik nalilinnik nassiussinermut nassarnermullu aningaasatigut killiliussamut tunngasooq tamakkiisumik taper-serneqarpoq. Taamaattumillu siunnersuutip ilaa taanna ataatsimiititaliamit annertunerusumik oqaaseqaatissaqarfigineqanngilaq.

Siunnersuutip immikkoortuata aappaani pingaarnertut siunertarineqarpoq Nuummi mittarfimmi nutaami nakkutilliinikkut unammillagassaalersimasut ilaasa aaqinneqarnissaat.

Nunanut allanut angalasut nioqqutissaatiminnik akitsuuserneqanngitsunik ilanngaaserivikkoo-russinnginneranni nunatsinni nunanullu allanut angalasut inini ataatsimoortinneqartarnerat Naalakkersuisut paasissutissiinerat naapertorlugu ajornartorsiummut tamarmiusumut tunuliaqutaavoq. Nunanut allanut angalasut nioqqutissanik akitsuuteqanngitsunik ilanngaaserivikkoortitseqqaarnatik nunatsinni angalasunut tunniussisinnaanerat tamatuma nassataraa.

Unammilligassaq taanna inatsimmik allannguinnikkut aaqinneqassasooq Naalakkersuisunit siunnersuutigineqarpoq, tamatumani nunatsinni angalasut nunanut allanut angalasutulli nakkutilliivigineqartalissallutik. Nunatsinni angalasut, akitsuuserineq inatsimmi siunertarineqartoq malillugu ingerlagaluarpat ajornartorsiummut ilaasussaanngikkaluartut, nakkutilliivigineqarnerat pineqaatissinneqartarnerallu pillugit inatsisitigut tunngavissamik nutaamik atuutilersitsinissaq Naalakkersuisunit kissaatigineqarpoq.

Taamaalilluni nunanut allanut angalasut inatsimmik malinninnginnerat nunatsinni angalasunut ajornartorsiutinngortinneqarpoq. Taakku nakkutilliisut paasissutissat pisariaqartitaat tunniuk-kumallugit piumasarineqarpallu akileraartarnermut ingerlatsiviup innersuussinera malillugu

nassatanik tamanik takutitsinissamut misissuinissamullu atatillugu nioqqutissat nassatatik nammineq piginerlugit paasissutissiissutigissallugu ilaatigut pisussaaffigissavaat.

Ilanngaaserisoqarfik aallaaviatigut nunatsinni angalasunik nakkutilliineq ajortoq Naalakkersuisut paasissutissiissutigaat. Nunanit allanit angalasut tikinnerminni nioqqutissanik akit-sersuuserneqanngitsunik nassataqarnersut ilanngaaserisoqarfiup nakkutigisassaraa. Siunnersuummi matumani, Nuummi mittarfiup naapertuutinngitsumik ilusilersorneqarsimaneranik taamaallaat aallaaveqartumi, ilanngaaserisut suliassaannik isumaginninnissamut naammaginar-tumik periarfissiinngitsumik ilanngaaserineq ingerlanneqarpoq.

Ilanngaaserinermik suliassap pitsaannerusumik isumagineqarnissaanik qulakkeerinnittumik ilanngaaseriviup mittarfimmi naapertuunnerusumi inissinneratigut nakkutilliinermik ajornar-torsiutit aaqqiiviginiarneqarsimanersut paasissutissiissutigineqanngilaq. Taamaaliornikkut ajornartorsiut pinngorfiani aaqqinneqarsinnaagalarpoq.

Siunnersuummut matumunnga ataatsimiititaliaq apeqqtissaqarpoq, taakkulu aappassaa-neerinninnermi Naalakkersuisumit akineqarnissaat ataatsimiititaliamit kissaatigineqarpoq:

Nunanut allanut angalasut nunatsinnilu angalasut ataatsimut tikittarfimmiittalernerisa aalla-riartortarfimmiittalernerisalu malitsigisaanik unioqqutitsilluni nioqqutissanik akitsuuser-neqanngitsunik eqqussuisoqarnerusinnaanera siunnersuutikkut pinaveersaartinneqassasq Naalakkersuisut paasissutissiissutigaat.

Apeqqu 1:

Mittarfinni ajornartorsiuteqarfiusuni mittarfiit iluisa ilusilersugaanerannik allannguinikkut ajornartorsiut siuliani taaneqartoq aaqqinneqarsinnaanersoq paasissutissiissutigineqassasq ataatsimiititaliamit kissaatigineqarpoq.

Apeqqu 2:

Nuummi ajornartorsiutit siunnersuummut matumunnga aallaaviusut Ilulissani Qaqortumilu mittarfinni nutaani aamma atuutissasut Naalakkersuisunit naatsorsuutigineqarpa?

Siunnersuutip pisortanut aningaasaqarnikkut kingunerisassai.

Aningaasaqarnikkut pingaarutilinnik kinguneqarnissaa naatsorsuutigineqanngilaq.

Siunnersuutip innuttaasunut kingunerisassai.

Tamanna pillugu siunnersuummi sukumiisumik allaaserisat innersuussutigineqarput.

Ataatsimiititaliap inassuteqaatai

Siunnersuut **akuerineqassasq** ataatsimiititaliami amerlanerussuteqartut Demokraatit, Inuit Ataqtigiit Siumullu ilaasortaataa inassutigaat.

Taamatut oqaaseqaateqarluni isumaliutissiisummilu allassimasutut paasinnilluni ataatsi-miititaliap siunnersuut aappassaaniigassanngortippaa.

Erik Jensen
Siulittaasq

Kuno Fencker
Siulittaasup tullianut
sinniisoq

Mariane Paviassen Jensen

Margrethe Thaarup
Andersen

Jørgen Rosbach